

## XXXI. IGANDEA URTEAN ZEHAR (A)

**Otoitza**

Jainko ahalguztidun errukitsua,  
 zure graziari esker,  
 ongi zerbitzatzzen zaituzte fededunek;  
 egizu, arren, Zuk agindutako ondasunetara  
 eragozpenik gabe joan gaitezela.  
 Zure Seme Jesu Kristo.

I. IRAKURGAIA: MI 1, 14b-2, 2a. 8-10

*Atera egin zarete bidetik,  
 eta oztopo eginarazi diozue askori Legean.*

Malakias Profetaren liburutik

«Ni naiz Errege Handia —dio diren guztien Jaunak—,  
 eta nire izena beldurgarria da herrialdeetan.  
 Orain, apaizok, zuentzako da agindu hau:  
 Ez baduzue entzun nahi, eta ez baduzue axolarik  
 nire izenari aintza emateko,  
 —dio diren guztien Jaunak—,  
 nire madarikapena bidaliko dut zuen gainera.  
 Atera egin zarete bidetik,  
 eta oztopo eginarazi diozue askori Legean;  
 hautsi egin duzue Lebiren elkarte  
 —dio diren guztien Jaunak—.  
 Horregatik iguingarri egingo zaituztet eta zirtzil  
 herri guztiaren aurrean,  
 zuek nire bideei eutsi ez diezuelako,  
 eta Legeari buruz alderdikeriak egin dituzuelako,  
 nor zein den begiratu.  
 Ez al dugu guztiok Aita bera?  
 Ez al gaitu Jaun berak egin?  
 Zergatik dabilta, beraz, gizakiak elkar saltzen,  
 gure gurasoen elkargoa lohituz?»

ERANTZUN SALMOA: Sal 130, 1. 2. 3

**R/. Zaindu ezazu nire bizia bakean  
 zure baitan, Jauna.**

Jauna, nire bihotz hau harro ez dago,  
 begiak ez dauzkat behar baino gorago.  
 Ez nabil gauza handien atzetik,  
 ni baino gorago dauden harrigarrien atzetik. R/.

Ostera, bil-bil egin naiz neuregan,  
 arimaren bakean,  
 haurtxoa bezala amaren altzoan;  
 haurtxoa bezala baita  
 nire arima neure baitan. R/.

Zaude Jaunaren zain, Israel herri,  
 orain eta beti. R/.

II. IRAKURGAIA: 1 Ts 2, 7b-9. 13

*Ez Ebanjelioa bakarrik,  
 baita geure bizia ere zuei emateko prest geunden.*

San Paulo Apostoluak Tesalonikarrei

Senideok: Apal agertu ginen zuen artean, bere haurrak maiteki zaintzen dituen ama bezala. Zuen maitez, ez Ebanjelioa bakarrik, baita geure bizia ere zuei emateko prest geunden; hainbestearino maite zintuztegun. Gogoan izan gure neke eta ahaleginak: zuetako inorentzat astun ez izateagatik, gau eta egun lan eginez adierazi genizuen Jaungoikoaren berri ona.

Gu ere Jaungoikoari beti eskerrak ematen ari gara; Haren hitza gure ahotik hartu zenutenean, ez baitzenuten giza hitza bezala hartu, baizik eta egiaz denez, Jaungoikoaren hitza bezala, zuengan —sinesten duzuenengan— ari dena.

EBANJELIOA: Mt 23, 1-12

**Aleluia:** Mt 23, 9b. 10b

R/. Aleluia.

V/. Bakarra da zuen Aita: zerukoa;  
 eta bakarra zuen zuzendaria: Kristo. R/.

*Esan, esaten dute; baina egin ez.*

Jesu Kristoren Ebanjelioa San Mateoren liburutik

Aldi hartan, Jesus honela mintzatu zitzairen gizataldeei eta bere ikasleei: «Idazlariak eta farisearrak Moisesen maisu-aulkian eseri dira. Egizue, beraz, eta bete, haiek esandako guztia; baina ez egin, haiek egiten dutenik; esan, esaten baitute; baina egin ez. Zama astun eta eraman ezin halakoak egiten dituzte, eta besteren bizkarrean jarri; beraiak, ordea, behatz batez ere heldu ez. Egiten duten guztia, jendeak ikusteagatik egiten dute; uhal-zirrinda luzeak erabiltzen dituzte, eta soinekoetan galartzu zabalak. Afarietan lehenengo jarlekuak, eta sinagogetan aurreneko aulkiak nahi izaten dituzte, eta enparantzetan agurrak; eta jendeak "maisua" deitzea.

Zuek, ordea, ez utzi inori "maisua" izenik zuei ematen; bakarra baita zuen maisua, eta zuek guztiok elkarren senide zarete. Eta zuen artean ez eman inori "aita" izenik lur gainean; bakarra baita zuen Aita: zerukoa. Ez eman zeuen buruari "zuzendari" izenik; bakarra baita zuen zuzendaria: Kristo. Zuetan handiena dena, izan bedi zuen zerbitzari. Bere burua goratzen duena, beheratua izango da; eta bere burua beheratzen duena, goratua».

**Oparigaien gainekoa**

Eskaintza hau egin bedi, Jauna,  
Zuretzat opari garbi  
eta guretzat zure errukiaren iturri santu.  
Jesu Kristo.

### **Jaunartze ondorengoa**

Gero eta gehiago agertu bedi gugan, Jauna, zure indarra;  
hartu ditugun sakramentuez sendoturik,  
beroiak agintzen dizkiguten ondasunak lortzeko  
zure graziak gai egin gaitzan.  
Jesu Kristo.